

近代中國史料叢刊續編第二十一輯
沈雲龍主編

先 莊 存 稿

言敦源著

附：景印袁（世凱）徐（世昌）兩公零簡

文海出版社
有限公司
印行

wt236/231

先莊存稿

許世英署
時年九十一



沈
亦
文
存

鳳
惠
題



www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



姚莊文存

常熟言敦源仲遠

倦懷閣藏畫序

六法者其卽六書象形之微旨乎晉唐以來純尙工筆宋元名家則主神韻遂爲不祧初祖間有專尙寫意者僅矣明清兩朝人才輩出大率師法宋元四王吳惲而外下逮方外閨秀蕃部肩背相望尤以康乾兩代稱極盛焉自時厥後海寓多故流風亦漸沫矣予生也晚四十年前游學宣南頗得追隨鄉老諸先生左右其時東南龜定政局小康士大夫從政退食之暇往往搜羅舊本競尙收藏每屆孟陬之初海王村日中爲市朱輪華蓋角巾曳杖于于而來者垂囊捆載至於摩肩擊轂塗爲之塞逮歲時伏臘尊酒過從則互出藏畫炫異鬪奇用以娛耳目怡心神其精鑑別者輒與專門名家無異然臨本

姚莊文存

一

日夥廣鼎雜出自宋元箸錄以來已有亂真之歎矧藝術家之僞託
與骨董客譎張志在射利魚目足以混珠蓋所值愈昂機詐愈厲千
狀萬態難言之矣輓近數十年來搜輯之富評鑒之精以景樸孫李
文石小石顧子山鶴逸邵伯英龐虛齋諸人爲巨擘皆有箸錄行世
予友山陰任君振庭文章政事卓然不羣近以所編倦懷閣藏畫目
記相示蓋歷年之所得皆唐宋以來之孤本巨跡又流傳有據者爲
多胸中有鏡目中有神自是孫退谷高江村張彌伽吳荷屋一流人
物瀏覽再三令人驚歎乃書其大凡以歸之亦如皇甫士安爲三都
賦作序附驥尾而名顯也

貽惠堂銘題辭

維時錦雨潤礎羅雲壓檐琴蟬畫張雷蚊宵闕蔡子慧孺出其尊甫

千禾先生貽惠堂銘屬題粵稽歸已歸親教孝揭於戴記父臣父政
不改美乎孟孫封翁彤章先生釋褐乙科起家茂宰歌踵招隱錄輯
歸田辭堯典陸族之舊聞篤周道展親之上德若夫送窮文拙續命
湯寒破甌生塵斜袞待斂瘠肥忍視標辟蠶傷始傾問絹之囊繼集
成裘之腋劉翊之殯合族鬼有所歸祖逖之瞻比閭貧而匪病或助
原壤之椁豈待顏路請車或分鮑叔之金不讓馮煖焚券河知潤委
葛能庇根瑾死如彼周急如此爲善最樂旣毫不衰所居之堂額曰
貽惠其意固已遠矣千禾先生荷重析薪訓湔肯構上念續緒下懷
紹聞懷先德之就湮製鴻篇以提要事不盡於形情不急於藻義不
牽其旨韻不移其義博約溫潤胎陸子之體裁蟲鳥笏爰軌漢人之
篆隸足使龍門自序子長退舍瀧岡表阡永叔廢書一爪一鱗雖豹

班之略見善述善繼本燕翼之詒謀義方不隳神鋒遽隕銘成於癸
巳之冬逾年卒於四川城口廳治所相距未周寒暑也某班慙都講
忝附婚姻景作誦之穆如冀昭茲乎來許然後知千禾先生醫東膠
之窾啓細席方聞蘇西蜀以吁茶牽絲行部敬宗之旨擴爲仁民庭
誥之嫻積爲行狀名父之子大雅不羣已今日者陳留四千卷遺書
尙遲寫定洛神十三行真本先得摩挲所望礪之珉石奠諸宗壙碑
版著錄爭盛業於名山橋梓觀型示雲礽以高榘甚盛事也嗚呼述
祖詩成將與客兒接武三槐銘在敢云愴父能文

跋手寫文莫室駢文

國朝自乾嘉以還人文鼎盛八家振轡二雅騰聲蔑以加茲難乎爲
繼溯承流於後進追過風於前林自鄙無譏頌聲不作然而孟堅削

竹詞賦且以名家蔚宗著書文苑於焉列傳詞章之尙匪今斯今豈
無識字一丁自居屈宋讀選半簡私擬都京究之逐者追趨則骯骯
乏骨蛇神牛鬼則樸質不文楚則失之齊亦未得王子晉卿陸機才
多王珣筆大以子雲之少作爲相如之高文故能筆運雲山思開金
石接六朝法乳無延之淺薄之彈守四傑藩籬絕郇瑕重髓之疾陸
大夫之雋永劉舍人之隱秀兼擅其勝不易吾言某久耳大名未窺
副本近以乞鄰之舉得循借癡之風比蔡邕帳底之論衡談鋒迥異
祕淮南枕中之鴻烈掌錄觀成

跋影印范肯堂先生墨蹟

范肯堂先生生當有清同光之際爲武昌張濂卿先生入室弟子與
其弟仲木鐘舊字仲林秋門鎧皆負文章重名瑞安黃侍郎體芳督學

吳中時所目爲南通三雄者也壯歲以還以詩雄海內沒逾十稔遺集始出而其手書翰墨流傳甚鮮曩者桐城吳先生摯甫牧冀州延新城王晉卿樹相掌書院教先生主講武邑而武強賀松坡濤更以吳先生之學設教於鄉數君子者聲氣相應宏獎後進一時學風蔚然爲畿輔冠先兄審博隨侍先君子新河官舍聞先生名以鄉人之誼上謁是爲訂交之始後先生居天津講學先兄亦以幕游續至過從益密迺贊所爲詩請業於先生之門躬爲弟子嗣是書札往還篇什唱和幾無虛日先生有摯友大興俞觚菴明震先兄師先生而友觚菴往往出新詩就正互爲推敲或此甲而彼乙或是丹而非素常以此劇爭雄辯兩賢相戾不以爲忤而更視爲至樂云先生爲詩多恃腹稿自得先兄論詩意合一夕挑燈盡寫已往諸作哀然成帙遂

有定本先兄以試吏河南遂與先生別所藏先生手札不下數十通
大都在癸巳甲午之交先生平日不以書名然翰動神飛備極剛健
婀娜之致本雄於文爲詩名所掩世人或不盡知今卽其書札文字
誦之亦可推見梗概矣余識仲木於大學交秋門於稷下惜於先生
未獲識面回首前塵忽忽一世至親骨肉之摧謝師友老成之凋零
感愴於中時時不能自己迺彙集先生所貽先兄手札爲之影印以
公諸世

肯堂先生墨蹟影印成旣紀其大凡復仿前人再跋之例以數十年
中聞見而翫縷焉先生天才超邁年十七應省試文采斐然嗣是負
海內盛名者卅年弟仲木秋門皆奉先生爲師力學成名獨先生數
奇久羈秋闈光緒壬午就試白下與泰興朱易君銘盤同里張季直

審舊名 汎舟秦淮有聯句排律流布遠近吳摯甫先生聞之慙勸招

致先生始北游後以吳先生薦至天津爲總督李文忠公授其公子

讀先生每日晡輟講歸或下簾讀書或開閣延賓以爲常先兄曩歲

客津海關道幕得與先生會合相處最久與先兄同幕者有桐鄉勞

玉初乃宜紹興柳琳軒士俊無錫楊石漁楫範夫模昆季武進李經

夔寶潛後陽湖汪子淵洵同客天津者有桐城姚幕庭濬昌叔節永

概喬梓與俞觚菴明震暨海州李嘯溪映庚桐城徐椒岑宗亮績溪

邵班卿作舟紹興周曉敷恩煦諸人時吳先生主蓮池書院講席於

保定松坡已成進士石漁之弟仁山楷今名道霖名官京曹亦往來於天津

諸君子意氣相得更以砥礪名節商榷學問爲志事五百里賢人聚

若有此種氣象後此展轉旅寄卒年五十一遺詩十八卷有范伯子

集行世先生詩得力於太白山谷爲最多文則服膺濂亭上至桐城
湘鄉諸老汎濫於漢唐若八法則以行草見稱當日與予兄傳牋往
復雖尺牘小品亦皆詞旨雋永筆勢高渾震紙欲飛與其平日耿介
拔俗之概相似流傳北方容亦有之必以予兄之所藏者爲最夥歷
歲已久幸弗失墜不與其詩文共可寶乎

兄審博公詩序

先兄審博績學多才中年徂謝論文見桐城吳摯甫師全集與粵西
周生霖先生畿輔校士錄論人見霍邱裴伯謙河海崑崙錄所爲詩
附見南通范伯子集并分見於同邑孫師鄭道咸同光四朝詩史集
暨近人海虞詩鈔方其下筆泉湧和詩疊韻百戰不怯故積詩繁富
光緒乙巳東游日本丙午歸國後遽於丁未秋一病不起僅於病中

詮次大凡手定堅白室詩草將謀付梓乃殺青未竟忽焉沒已予嘗
收集遺箸再三鄭重始成此編日月不居蓋忽忽逾二十寒暑矣昔
穎濱爲東坡墓志曰公之與轍皆師先君於文得之於天又曰見善
如恐不及見不善如恐不盡見義勇於敢爲而不顧其害用此故困
於世然終不以爲恨東坡往矣先兄文章氣節固不敢妄擬前賢然
子貢方人老彭比我生平慕義猶有此風因論先兄之詩而附及之
重修言氏家乘序

自始祖先賢言子越七十三世至魯源公素園公昆弟於有清乾隆
丁亥師商邱宋文簡公家乘之例成言氏家乘六卷後十二年己亥
七十四世耐愚公踵而行之均有紀事文前者爲常熟支所專有後
者以常熟支爲經而以凡來通譜之各分支合而一之規模體例之

精自明三百年來未之有也七十八世忠益公於嘉慶癸酉七十九世良愛公於同治間皆預於常州支家乘之役獨常熟支以咸豐庚申之亂八十世翰博家柱公以身殉節宗譜板本悉付灰燼同治甲子後七十九世王父蔭穀公攝行翰博將爲家乘之謀有通告各子姓書條例具備未幾遽謝賓客光緒甲午先君子輯家乘叢稿成迄今敦源得以藉手者得力斯編實多顧自庚申亂後吾宗之祠宇祭器法物圖籍固已蕩焉無存而其間之男死義女死節者更僕難數各子姓之流離失所散之四方者尤夥此不能不有待於調查者一也大宗一支統緒中斷卽以縣東支論入嗣者已三次大宗爲子繼別爲宗宗法雖今異於古然枝分派別源遠流長此有待於調查者二也往者官撥祭田以沙田居多旣代遠而年湮復勢殊而世異或

桑田而滄海致今少而昔多遜國後優待條件僅及滿族世職言子後裔初改爲奉祀官比中央政府成立又復撤廢鼎新革故率非舊觀此有待於調查者又一也追溯乾隆丁亥以來時逾百年世凡十易經十餘寒暑之力續修家乘粗獲觀成體例一仍舊貫間有補綴詳於凡例今行將付梓爰泚筆記其本末吾宗承先賢遺澤再世與先儒申詳爲甥舅見於禮經檀弓篇中數千年來舊德名氏稱於海內十六世成大公始創家譜卅五世寅恭公四十三世思本公五十四世斌公六十一世順孫公六十七世吉甫公凡續修者又六次七十三世似白公七十四世馭平公苦志勵行得邀世職逮素園公北游太學出爲守令宦成歸里興復故物耐憇公與弟皋雲公秉承父志肯構肯堂是時也海寓乂安重熙累洽百貨豐物費輕而事集由

是丁口繁衍科第蟬嫣號稱極盛詎意數傳之後迭經道咸兩朝水災與兵燹摧殘傷毀靡有孑遺傷已迨先君子流寓北方洊陟仕途先兄審博與敦源亦叨竊天祿於門衰祚薄中稍稍自振方以素園公喬梓盡心宗祏爲志事終以時會艱難物力凋敝宦橐蕭然微願莫副祠宇旣未重新圖畫空存簡策恢復之望留俟後人僅以是編昭告先靈興廢繼絕與敬宗收族云乎哉

重印唐杜光庭撰玉函經序

余家常熟自曾祖元超公讀書奉親以醫活人著小道可觀一書行世後以板燬遂失傳僅傳播者數方耳亡室丁毓瑛心細好學初守漢人中醫不藥之說及侍先妣疾躬親湯藥日在左右積久於方書藥性均有領悟暇則流覽醫經本草不可解者反覆思之不以爲苦

光緒甲午余應秋試赴京次子生甫晬病暴下抱持之體如冰森然
砭人置諸牀氣息僅屬諸醫束手毓瑛於夜燈中從幼幼集成書檢
得附子理中湯一方秉承先考先妣飲之而次子手溫回春矣自是
遇有良方並先考先妣手鈔方書皆編輯成冊守而毋失每年合藥
濟人榜諸門來乞者應接無倦比年多病嘗延揚州談介眉先生來
爲診治談君一日出鈔本唐杜光庭所著玉函經相示杜光庭字聖
賓生值五代朱梁竊國遂以醫隱家本括蒼王建據蜀時授戶部侍
郎後隱於青城山玉函經舊有宋刻本黎民壽作註醫門列爲無上
品明殷仲春曾藏之其書斷死生於脈理補前此諸家所未盡殊可
寶貴毓瑛讀而好之乃銳意校勘亟思付諸剞劂以餉世人未幾病
歿余念其生前用心甚苦抑此書湮沒可惜遂重爲校讐付梓俾得

流傳且誌其緣起如此

跋黃善臣通守所藏袁文誠手書詩文冊頁

右項城袁文誠公行書三十六葉都古今體詩五十篇末附散文二篇爲同治朝左宗棠用兵陝甘公奉朝命主持軍糈時箸黃善臣通守方客公墓中輯綴零牋以歸乃彙爲一冊暇日出以索題予受而讀之蓋有不能已於言者焉公綰西征轉輸之事大兵遠行東南各行省分任軍餉大率不以時至公信孚西商恒貸巨金預儲甲仗糧秣之屬露積山委如期轉運一朝罄淨比協餉至迺償西商逋一月之中繼續轉環無少休以故將士無內顧憂事訖朝廷將大用公光緒初晉豫大役歸里籌振焦勞致病卒以不起惜哉方公在西安時深以老師糜餉爲慮曾疏請帥偏師出關其氣槩殆不可一世以視

同時浙人胡氏倡募外債弋名射利較其心迹則公私之判章章矣
予習聞公雄才大略而中州父老時時談公軼事豁達大度動人歎
慕耳食者久之若乃得展公墨寶則實自此冊始詩不拘守繩尺然
置之明七子之列故無愧色文亦出入於戰國策三蘇之間書法頗
似魯公爭坐位帖雜以米董想見當日唱籌量沙委蛇餘閒彌復賭
詩選韻文章爾雅猶有乾嘉諸老輩風格是冊屬草未定間以塗乙
靈飛三表故有例在不礙其佳雖僅鱗爪至可寶也因識數語以歸
之善臣

書謝履莊家訓後

雲南謝履莊觀察由詞曹東渡日本宣統朝授天津兵備道調清河
道時予初筦保定軍械局請于大府仿地方官交代增負監盤之例

清軍器杜流弊也遂著爲令而君任監盤此予與君邂逅之始予旋領偏師戍朝陽乃別去辛亥秋八月石家莊變兵謀反撲保定君偕方伯凌潤台福彭廉訪翁弢甫丈斌孫嬰城固守予亦在德州司防護德州機器製造局之責彼此備嘗危難所處境地略同遜國詔下君翩然挂冠去自是瀉裝天津暇輒與曹耦藉酒自遣豪於飲者君而外渠楚南本翹華璧臣世奎朱經田家寶暨潤台弢丈稱最吳潤生嶽謝受之嘉祐次焉潤生之弟闡生對與予雖皆止酒而亦得蝨於其間致足樂也比歲以來楚南闡生弢丈先後凋謝經田繼之君之沒後於經田者不及百日今夏受之又逝僅存者潤台璧臣潤生與予爾追憶舊游渺如隔世旣傷逝者行自念也君恂恂儒雅誠篤君子善與人交久而能敬未嘗見其面赤雅量冲襟概可見已今次

公仲奇出其所藏尊公訓詞一通屬題根抵深厚毫無裝點門面語
馬援王昶庶幾古人予於觀察愛之重之知其所守者嚴而嘉仲奇
之堅苦卓絕能不墜先緒也故撮述十餘年來往迹以歸之

跋賈生潤民攝影

國朝乾嘉以還人文鼎盛其時攻古文者爭祖桐城文派遂徧海內
百餘年來其風亦少替矣洎淮淝子弟異軍特起踵背相接武功卓
卓若隱與桐城文派角勝而互爲消長也賈君潤民往嘗依其世父
制壇總鎮於北洋軍中以父蔭官復折節入兵校益研究測算輿圖
炮械之奧今且學成卒業他日者分任天下之重文事武功足與鄉
先達繼美建立之偉願可量乎頃者出其攝影小像屬題因綴數言
以勗之

跋李生在田小像

天津入國初僅一衛所治自海禁大開屹然爲北洋重鎮其人類多任俠好義然諾必踐慕朱家郭解之爲人故咸豐庚申之役足以禦狂寇而憐遠夷前事亦旣章章矣顧閭閻子弟變本加厲雖眦眦爽德輒刺刃人腹至死而不悟悔殆武健之弊猶未馴至於道歟比者風氣棣通兵校林立優而游之儻詰朋興必有突過前人者質之李生其以爲知言否乎

跋天津友人攝影

嗟乎人生離合之際殆難言矣僕生於天津學於天津往來於天津所與遊者亦以天津士大夫爲最夥有數歲而一見者有一歲而數見者昔時人和年豐物產繁盛號召徒侶流連楮勺被酒縱談與四

座歌呼之聲相應莫逆於心互視而笑雖視平居里巷歲時伏臘晨夕過從者未可一二言而二三知己推襟送抱當時忽忽恒不自覺逮事過境遷蓋無日不往來於胸臆而不能釋比年余依袁慰廷中丞於天津之南鄙今者復從軍濟南辦嚴臨發友人祖道錄別謀以泰西攝影法留圖以識不忘時光緒庚子三月也圖成凡九人其淵懿靜穆慄然難犯頭角崢嶸才露半體者嚴君範孫也豐頤廣頰脫帽露頂斜持麈尾有若談元者趙君幼梅也骨相清臞神彩奕奕側露半面凝睇注視者張君文卿也余則交袖屈脛憑闌而坐於其間其比肩而左年少翩翩相對偶語倚裳聯坐履石而傍花者劉君漸遠也袖手拄石欹身斜坐儀態自如從容不迫者陳君鏡涵也長袖寬衣植立不倚者劉君煦臣也旁坐微笑藹然可親者爲高君介臣

喪服嶄然者爲劉君蘭亭知友未與於是圖者曰徐君菊人王君仁安韓君伯朋他日相見出此示之固猶劫火以前之物也夫

周宜人傳

宜人諸暨從九周高榮長女性孝友自幼莊謹如成人適同邑陳敬基陳氏系出漢太丘長傳六十一世至南宋宰相文定公始遷諸暨又十六禩至敬基世業儒考某道光乙酉選拔本科舉人大挑得海鹽教諭入名宦志沈文恪徐尙書用儀顏雪庵學士皆師事之兄孝基同治丁卯補行甲子科副舉家故小康丁故中落敬基師事其兄由增貢生晉職內閣中書宜人封贈如制初孝基爲塾師於邑之絃琴崗與宜人族叔普有雅故將介以爲媒兼溪周贊文聞之竊笑曰若故貧若弟且爲人傭書期昏於吾周胡誕若是普卒以爲請高榮

日陳氏世有令德焉有如敬基而長貧賤者乎遂報允既納采贊文復讓之曰爾以女女窶人胡若殺而臘之敬基聞之讀益奮以貧故不能親迎高榮乃爲之備物使行昏禮時同治丁卯敬基年既二十宜人則二十又一矣合卺之後宜人躬親井臼口不言勞雖屢空至不能舉火晏然無怨色第相勗劬學而已居恆以不逮事舅姑爲憾每偕行展墓輒失聲泣數行下時祭必敬必絜甲戌敬基入邑庠光緒乙亥補增廣弟子員名譽日起會食指漸繁省試數報罷乃北游保定習法家言入司曹讀律得上計禮聘交至治刑名錢穀爲州縣客館穀所入視前有加以遺宜人益勤儉不改常度督諸子讀尤嚴謀婚嫁凡鄰里親族之窮乏與貧不能婚葬者皆資之更以其餘節衣縮食出置田宅而家復振身先服勞既老不倦丙午四月以病卒

年六十葬北門外佛肚臍山

論曰粵稽禮經內則女子之職一出於學自禮失求野世之人視泰東西女子教育皆有程度遂詫爲伊古未有之事何其僨也然學而幾者人也不學而至者天也若宜人者殆所謂天授非人力深有合於古之賢婦者歟余以通家子始識宜人於辛卯之歲時吾父方知井陘倚陳公爲重客約爲兄弟百事取決年逾四十美丰神飲人以和皆曠就之往往論次家事臚舉宜人志行絮語不能盡聞者忘倦至移家北來吾父復割官廨宅之宜人與先妣相見勞苦如平生懽蓋皆堅苦卓絕治家而中興以故推心置腹情親有加歲時伏臘更設具召余兄弟飲以酒雖斷葱截肪宜人必躬預其役而不苟乃知嚮之所耳聞者僅得目覩其狀槩之萬一焉丁亥冬先妣棄養年六

十二宜人已先期南旋齒少於先妣者且十年庶幾優游里閭頤養遐齡乃曾幾何時丙午春莫余攝鎮於大名陳公方自威客遵化而宜人之訃至年僅六十殆與先妣相等乃知刻苦勤勞其百折不回之志與一往無前之概精神氣血早消折於數十載以前有不自知者而卒以此不永天年爲可慨也

節婦蔡田氏傳

大城節婦田孺人歸同邑蔡曾藻未期月而夫死其生也未通片語其死也始獲一面乃茹苦含辛守節以終其身敘述本末真足泣鬼神而光日月於以見詩書之教澤禮義之大防爲不可及也初曾藻考諱某年十五補博士弟子員有文名曾藻年十六與其弟曾承出應府縣試皆前列世家爭與論昏田翁家素封遣介通媒妁昏有日

矣會學使按臨不得已以妹代行合巹禮比試歸曾承獲售曾藻以
違式被放愧不願見其婦家人強之乃俟滅燭後入室遂裹衣蒙被
臥天未明啓扉去家人尾之已在鄰村塾中發憤伊唔矣同學生有
知其事者課餘輒虐戲之噪而環逐不休或前或後繞院三匝無處
可避勢將及誤用力舉腿傷其隱處曾藻登時死以尸畀諸家哀哉
孺人卽立志守節未嘗見齒孝親和眾屏脂粉甘荆布紡織度日逾
年歸寧其母欲奪其志將使之再醮於某富賈孺人百折不回再三
辯論其母持之堅孺人知不可以理爭也遂引刀自剗其胸母趣前
奪之然已重綿洞穿血湧如注幸不透膜去死生在毫釐之間延醫
亟救之匝月始愈母終閔其貧且勞也孺人乃舉魯文伯之母敬姜
勞逸之說以自勵可謂賢已孺人年八十時已以病旌表如例至臨

終乃言曰身體髮膚受於父母不敢毀傷獨當日刺心之舉爲萬不得已耳鄉人以其事具狀上達旌表如例嗣子訪疇前卒婦劉氏亦以撫孤守節聞孫藹如實承其重云

論曰自宋儒失節事大之說興世有夫死而不守志者人且訾議之蓋宋以前婦女之守節者人皆重之否則亦聽之至宋而禮教益嚴世之孀嫗貞媛出死入生志堅而行卓往往傳之文章播之歌頌尸祝而馨香之至取節婦以配節臣節士若孺人殆可以無愧矣

何求老人傳

老人姓呂氏名留良又名光輪字莊生一字用晦號晚村其先河南人南宋之世崇德尉名繼祖者始遷於浙遂爲浙之嘉興人高祖淇明錦衣武略將軍曾祖相沔陽州判祖煥山西太僕寺丞本生祖心

源尙南城郡主淮府儀賓泰興令父元啓鴻臚寺丞本生父元學萬
 曆庚子舉人繁昌令年六十九卒後四月側室楊孺人始生老人時
 崇禎己巳正月二十一日也兄大良茂良願良瞿良皆妣郭出老人
 生而神悟八歲學爲文出語奇偉驚長老及長博學多才藝尤篤信
 洛閩先儒義理之說癸未入邑庠按呂公忠所爲先君老人略癸巳入
 庠已在清順治十年諸生清制生員服色與明異證以老人無漸尺布裹頭之詩決爲明
 諸生無疑癸巳必爲癸未之誤其時年十五蓋十三歲奉母諱至是
 亡服闋在甲申明年甲申明亡既而學使按臨乃詣學官自陳以學
 法除名親知駭異老人則怡然賦詩有飯要不全行莫顧簞如當易
 死何妨之句康熙戊午幾與於鴻博之選力避得免幼嘗咯血以姪
 亮功喪而益劇幾絕矣庚申夏方對客而郡筭下將以隱遣舉乃噴
 噴徧地一坐皆驚自是落髮爲僧更名可耐字不味號何求老人自

恐病終不起乃壹意著述終日不輟更補輯近思錄發凡起例未及成書病革門人入問勗以努力爲學誠子姪以孝友言畢叉手安寢而逝時康熙癸亥八月十三日年五十五妻范氏子七公忠主忠寶忠誨忠補忠納忠止忠孫五懿歷懿緒懿業懿威懿統老人於學無所不通凡天文織緯樂律兵法星卜算術靈蘭青鳥丹經梵志之屬皆洞明本末工顏米書法能彎五石弧下至執槩投壺張琴撥阮摹印斲硯皆精絕自遭國變隱居求志初居梅花園課兒棄諸生後歸臥南陽村旣削髮築風雨廬二妙亭於吳興埭溪之妙山嗣是幅巾拄杖往來於寒潭修竹之間四方從游者甚眾老人夙多師友方其少年氣盛掉鞅文壇玳筵珠履遐邇輻輳人謂自復社以來未之有也顧擇交綦嚴與同邑孫子度吳孟舉鄭高且中餘姚黃晦木兄弟

桐鄉張考夫鹽官何商隱吳江張佩葱清溪徐方虎諸人以道義相切劘暇則以詩互相酬答且中以女許字老人子某一日致書曰某病將死家貧息女不足以辱君子請辭卒娶之且中卒冒雪會葬烏石山人聞笑聲異決爲老人覘之果然高氏將刊墓志而文不稱老人歎曰銘之義稱美不稱惡此何爲者遂止之孟舉卒哭之痛曰吾質亡矣爰有質亡集之刻並及諸亡友之文未著見於世者復輯其遺事以傳焉同社陸雯若因事偶相失或請絕之老人笑謝乃愧服及雯若卒經紀其喪爲刊其所著東臯遺選故人某死於西湖葬於南屏山下蓋其結友推誠通財急難若將不及極之雨覆雲翻一秉誠信積久感動遇之如初尤篤於天性年十三居母喪哀毀逾禮又以生不逮事父母每言及輒嗚咽流涕遇誕辰必哀戚家祭必竭誠